

偶

齋

詩

草

偶齋詩草內次集卷三

陽生集

宗室寶廷竹坡著

和杜子美百憂集行

我憂君兮九州四海無時平我憂民兮兵戈水旱無時  
甯我憂父兮高堂奉養難豐盈我憂母兮終天抱恨難  
重生我憂兄妹兮生離死別同凋零我憂妻子兮號寒  
啼飢同伶仃我憂貧賤兮衣虧食欠終歲勞經營我憂  
禍患兮灾奇難險朝夕恒牽縈出亦憂入亦憂寤亦憂  
寐亦憂憂家憂國無時休心燔膽炙肝腸蹂躪思萬慮

相綢繆瘁如鬼魅幽如囚跼天踏地空垂頭心寒淚熱  
互糾結晝號夜哭畢世恒牢愁我恨不能身化萬里風  
吹清九有銷狼烽我恨不能身化十日雨普潤窮黎不  
毛土我恨不能身化還魂丹重醫我妣生人間我恨不  
能身化不死藥保我老父常康樂立教國重安全家再  
興骨肉團圓絕危惡其奈天心不可轉時命不可移東  
身待困才難施手提吳鉤淚空落丈夫七尺生何爲太  
空蒼蒼大埜茫茫古往來今栖栖皇皇邈焉中處眞堪  
傷三百六旬日何短一十二萬年何長縱使無灾無害

畢生享奇福亦復百歲同銷亡而況百憂感心萬事勞  
形不許一刻舒心腸我告天兮我憂天難祛我告地兮  
我憂地難除我告人兮我憂人難驅天兮地兮人兮俱  
難救我急揮毫聊和百憂集

感舊

卅載蹉跎困草茅塊然孤處歎懸匏無窮心事憑誰訴  
有限年華枉自拋怕向道途逢故僕羞將姓字告新交  
滄桑變態悲難說低首燈前句獨敲

樓臺金碧鬪清新舊第經過暗愴神松竹平分深院月

鶯花并作小園春青山那解悲前事流水無情憶故人

惆悵幼時嬉戲地隔牆遙望倍酸辛

刑部街故宅頗有亭臺花木余所生

之地也今爲鍾公小岩岱之所有

芳園幽邃足怡情臺榭回環巧換形淺水割成三面碧

好山分送半樓青

王公廡故宅有亭三面臨水有樓惟西面見山

花陰滿逕空

勞掃槐影遮扉不待扃門巷猶存人已異才華枉憶舊

居停

宅爲鍊荔岩先生林故居

扶筇西望碧嶙峋一帶巖巒舊卜鄰庭樹料應如我大

山雲也合笑人貧談經訪道踪誰繼問字論詩跡已陳

城市囂塵難久住故林何處許栖身

賢幼時侍父菴居西山荔崖先生法

華上人常與同遊竊聞緒論

僑居古寺幾經年回首風光尙宛然松柏影添千嶂翠

芙蓉香膩一溪煙攤書石上僧同坐醉酒花閒鶴共眠

□□□□□□飄零辜負好林泉

幼嘗讀書靈光寺有亭臺池沼之勝

水色山容儼畫中昆明曾記駐遊踪花含瑞露圍金殿

樹繞仙雲擁玉峯十載干戈空洒淚九天宮闕盡爲烽

鼎湖一去龍難返翹首西郊恨滿胸

庚申夏侍父僑居柳浪莊得遍覽湖

山勝跡今不可復遊矣

虛度韶華廿八年一回思憶一潸然紙鷲難覓兒時綫  
竹馬空存昔日鞭死別生離魂共斷新愁舊恨意同牽  
題成俚句增悲感反覆吟哦竊自憐

無錢歎

囊無錢空長歎長歎亦復難得錢東城迢迢尋故奴故  
奴遠在新主家叶鬼鬼甲第連通衢

無衾歎

眠無衾無衾寒難眠中宵把膝悲辛酸嬌兒哭告娘北  
鄰新婦衾連牀

雪中感懷寄吳泉麓

時客保陽

愁腸磊塊酒難澆  
斗室孤眠夜寂寥  
凍雪敲窓故紙裂  
冷風穿壁殘燈搖  
寒威逼骨睡難穩  
生計關心愁不消  
卻憶故人荒店裏  
茅廬獨臥更蕭條

夢吳泉麓

夜深聞扣門  
開門見君至  
云自保陽歸  
京華度新歲  
入門恣諧笑  
相對誦新詩  
告予未晚飯  
買餅聊遏飢  
持錢投餅師  
徘徊無所適  
鄰鐘一聲動  
開眸窓漸白

偶成



干戈憂未已況值境艱難但使家能保敢望身得安有  
親同困苦無地避飢寒底事竟如此仰天空自歎

有鵲

有鵲有鵲鴈毀其巢巢覆無棲鍛羽而逃舊巢今再爲  
鴈兮鴈兮休再來

黃鶴飛行

黃鶴飛鳴聲悲野無食常苦飢安居却羨樊籠鳥不飛  
不鳴腹常飽

連理枝行

連理枝一枝曲一枝鳳凰棲一枝鷓鴣宿願君持斧斫  
此枝免人稱惡木

入官集

戊辰

元旦偶書

吁嗟乎乾坤何處堪容我低首塵埃淚羞墮丈夫豈肯  
作常人不愛奇窮受奇禍功名富貴何足言災深害重  
愁連綿納汙含垢苟偷活仰愧俯忤空增年男兒有首  
何妨落快意當前死猶樂如何時命太欺人惡趣纏身  
牢束縛北風不鳴紅日暖春泥滿地殘雪淺倚窓癡坐

何陋堂文集卷二  
三  
嘯出門獨對殘書把酒盞廿八年華頃刻過式飲式食  
空蹉跎安得身隨去年去九原訪舊同吟哦友人少時  
先逝舊時

詩酒  
交也

### 偶成贈芷亭

君本世外士曠達無所求爲我罹憂患愁緒常綢繆今  
年幸成名差足寬君憂努力事前途莫爲良朋羞  
貧賤良可憂富貴亦足畏從古多才人功名每易志惟  
君知我深惟君愛我至勸戒勿嫌煩相規莫相棄

### 輟駒歎

有駒有駒駕彼金車雕鞍玉勒馳彼天衢金車金車匪  
不華束身轅下良堪嗟

書扇

本非功名人強入功名路猿鶴著衣冠拘束難行路欲  
留不樂留欲去難遽去仰首望西山白雲滿深樹

秋草和文鏡寰

四野韶華轉眴更荒原翹首劇傷情拚教烈火燒全盡  
不向春風望再生憔悴幾叢連僻逕淒涼一片接孤城  
知心賴有寒蛩在代爾深宵訴不平

離離遍野任縱橫  
露冷煙荒畫不成  
夏雨頻滋懷昔日  
春暉欲報待來生  
北堂萱死難重茂  
東閣梅新枉自榮  
迴首年華漸消歇  
托根空詔在蓬瀛

蓬蒿弔地望紛紜  
寶馬香車悄不聞  
十里曉霜孤客路  
一坏殘照故人墳  
荒村寂寞埋蛩語  
古道蕭條下鳥羣  
依樣摧殘歸野燒  
當時空自辨猶薰

休誇如帶復如茵  
好景重思暗愴神  
夜雨戰場埋白骨  
秋風古塞走青燐  
西園拾翠人何在  
南陌尋芳跡已陳  
且莫登臨歎凋落  
重生又是一年春

東風吹出綠迢迢接水連山入望遙到處生機同活潑  
幾時芳意忽蕭條殘花著雨香先盡衰柳經霜葉漸凋  
舊景不堪重注目平蕪獨步暗魂消

牧遍牛羊尙有餘芊芊黃繞野人居孤根帶土乾將折  
敗葉沾泥凍不舒寒雨何須頻浸潤春風那肯更吹噓  
朽枯未必無嘉種寄語園丁莫盡除

商音滿耳感凋零水涵池塘夢久醒寒日晒乾三徑碧  
峭風吹褪一堤青西郊春暖曾盤馬南畝泥深亦化螢  
休笑微芳無勁節冰霜雨露已全經

殘莖敗葉委埃塵冷露寒霜挫折頻小草豈真無遠志  
嚴秋何日返陽春寸心鬱結根難死弱質凋殘蔓不伸  
迴首青葱才幾日衰榮移換摠前因

擬古

自來擬古者惟學其貌如小兒摹字處處隨人縱  
摹倣逼肖其妙仍非已有最爲下品才高者恥於  
隨人步趨恒自出新奇又乖擬古體裁擬古云者  
當擬其神而亦不可弗擬其貌必神貌皆肖乃不  
負一擬字不然遺神取貌是襲古非擬也遺貌取

神是學古亦非擬也暇日無事戲擬八首格調俱  
本古詩而命意不敢蹈襲雖摹擬太甚而決非拾  
古人唾餘腴存集中以質世之好擬古者

日日復日日離君將十年山川阻歸途有家難言旋鴻  
鴈期不來音書誰爲傳關河隔千里道路嗟艱難水深  
車難挽道遠客難返思君君不還離懷空輾轉相逢果  
有時垂老敢云晚客途慎疾疢珍重休強飯園

園中花豔豔門外柳青青紅樓起鬼鬼有女何娉娉麗  
質雖皎皎貞心自硜硜幽居三十年蕭條無問名爭知  
倡家女十三學送迎



園中有佳卉花葉相新鮮牽枝欲寄君躊躇不敢攀豈  
伊道路遠恐君不忍看微芳何足惜離居已經年

有客東方來遺我金縷衣相交才幾時厚愛竟如茲藏  
之青箱中一日三五窺顏色難久留勿因新舊移

朔風號苦音明月輝綺疏晨鷄寂不鳴誰問夜何如故  
鄉隔千里引領增欷歔獨宿強成寐飄然還舊居道途  
阻且修歸來不須與握手登高堂老弱同歡娛離魂倏  
驚覺攬被空長吁輾轉心悠哉涕下如連珠

杲杲東方日皎皎西方月迢迢兩相照汲汲出復沒雙

輪不暫停昏旦行，剽疾百年若轉瞬。永壽孰能必死期，猶未知世人焉肯歇。

生年不滿百

用古句

每思千歲歡，壽少苦欲多。局促難求

安，人生貴守分。知足無妄求，縱情恣懽樂。滿志滋煩憂，祖龍慕延年。營葬驪山陬，

鴛鴦不孤飛。連理不獨生，妾心自如火。君懷寒如冰冰，寒能再溫心。僞能再真，新情移故愛。攬鏡空悲辛，傷彼芙蓉花。淩波標芳芬，秋風一飄泊。弱質汙埃塵，芳華何須惜。衰朽良自慚，與君多結子。留報滋培恩，

秋懷

斜陽下秋浦把酒獨登臺遠道不可見西風空自來干  
戈憂未已歲月暗相摧轉瞬時光易愁懷何日開  
獨坐增惆悵聞庭鳴亂蟲無錢難買醉有恨只書空命  
薄愁身貴家貧忘歲豐生涯歎寥落誰與問窮通  
古砌苔餘碧閒門柳轉黃幽懷正岑寂秋色更淒涼窮  
極詩翻拙悲多酒不狂幾時入山去負耒作村氓  
滿耳商音動窮居又早秋佳時難遣興好景總添愁風  
起樹疑活雲來山似浮無由消積悶曳履且閒遊

落葉

商音滿耳劇消魂  
落遍山村與水村  
一片黃鋪樵客徑  
幾痕紅點野人門  
摧殘不畏風霜苦  
枯朽難忘雨露恩  
寄語家僮休掃去  
凋殘終願守孤根

朔吹蕭蕭號苦音  
殘莖敗葉滿平林  
四山風雨夜涼急  
萬里關河秋氣深  
衰朽敢期松栢操  
凋零不改歲寒心  
拚將弱質填溝壑  
任爾冰霜取次侵

濃煙淺黛化埃塵  
屈指秋光剩幾旬  
甘露潛滋空有望  
狂飈暗捲太無因  
詩吟杜甫情淒切  
賦作蘭成意苦辛

若許明年重茂密清陰願覆往來人

萬片丹黃遍野飄漫空幾陣下蕭蕭參差吹滿松閒屋  
錯襍鋪平柳外橋落地豈甘化泥滓乘風猶欲上雲霄  
鮮妍卻羨唐花好借勢薰蒸也後凋

### 蘆花

蘆絮渾如柳絮多江頭盡日自婆婆纖痕密密黏魚網  
亂點紛紛壓釣簑潔白何防汙泥滓飄零久慣受風波  
敷榮不借陽春力謝女詩工莫錯哦

弱絮隨風劇可憐秋空得意舞翩翩也知根淺難離水

自恃身輕欲上天兩岸淡煙迷酒旆一溪晴雪送漁舸  
本無衣被蒼生用枉說開花似木棉

曰壯集

言志

官小才當大位卑名可高隨分享庸第鄙哉非英豪人  
生當自勵委靡徒惹嘲歲月不我與壯志休虛拋卓卓  
張茂先志趣凌雲霄

義輪耀清晝望舒輝永宵昏旦相代成百年猶一朝壯  
志苦難立奔走空自勞休名非妄博蹉跎成二毛浚土

池方深疊石山始高潛心勵學修黃髮如垂髫

詠史和左太冲

男兒生世間所志非功名丈夫有大志豈與時人爭經綸莫施展才調空縱橫金馬與玉堂區區安足榮奮身登天衢揮手攀櫓檣招風洗四海立待乾坤清上報

君父恩下慰羣黎情功成挂冠去大笑歸蓬瀛

豈無段干木終難樊衛君豈無魯仲連終難却秦軍漕難只自免安敢言解紛無功亦受賞何計酬君恩悠悠豈足恥從古已如此

巍巍長安城繁華冠南北  
甲第連通衢樓臺競雕飾  
朝廷走優俳暮席鬪箏笛  
珍錯恣拋踐揮霍日千億  
奴驕擁重資僕狂竊高職  
炙手熱難當奢華日無極  
梁肉厭不餐廣文獨乏食

買臣困樵采伉儷甘分離  
長卿還成都王孫棄如遺  
人生榮與辱恒因時勢移  
室家尙如此宦途從可知

鳳凰不輕飛一飛凌青雲  
志士不輕出出建絕世勛  
遇合良艱難命途多迍邐  
遭時大行道古今有幾人  
李綱不久相萊公終沈淪  
有志難盡行顯榮焉足論  
人生有



天命奔走空勞神一枝如許棲願言終此身

三十初度感懷

光陰廿九指彈過壯志峻嶒已半磨人世無緣知己少  
浮生有幸得詩多傷懷怕讀秋聲賦感舊愁逢春夢婆  
盥誦佳章增慨歎盛衰一樣悔蹉跎

兩鬢垂青尙未斑濫竽竟許步蓬山雲難作雨何勞出  
鳥不遷喬已可還羞借科名驚俗目聊將詩酒破愁顏  
幾時得遂歸田願菽水娛親凡慮刪

窮愁旅恨五千首家難國憂三十年世事推遷陵變谷

人情反覆海成田  
新詩滿壁心誰識  
濁酒盈樽恨莫蠲  
醉把芙蓉下階舞  
碧天萬里月輪圓

寸心無計報春暉  
迴首懸弧事已非  
草可忘憂休再種  
烏難反哺枉高飛  
三年懷抱恩空負  
廿載飄零魂不歸  
幸喜靈椿陰尚茂  
殫心甘旨莫相違

夕陽

飛輪西下疾如馳  
圓影團欒樹杪垂  
餘熱縱能留片刻  
殘暉未必耐多時  
炎炎氣勢猶堪畏  
忽忽光陰亦可悲  
轉眴東方望舒現  
一般皎潔挂天陲

壬申集

恭步 御製神木謠原韻

皇穹莽蒼大地腴篤生神木精靈扶千年鬱森一旦枯  
洪濤揚泊填河渠舊傳大水漂木至此不行因留焉獻嘉薦祥朝 皇

都嗟江難舟山難輿上古有大椿不殊朽不可雕異宰

予龐然酣寢郊東隅臥石藉草陳荒衢海槎貫日留遺

模

木中空形如槎

棟宮梁闕其舍諸大材難用嘲樵夫柯枝剝

落陰莫敷雨斤風斧凋寒膚崇碑崔嵬書迴紆 天章

燦爛光靈區

亭前碑陰陽勛高廟御製二詩

奮當奮起重扶疎高哉

矗立形危乎炳靈煥作中興符曲轅商邱方蔑如長生  
萬載億載餘 皇基甌鞏懷永圖

恭步碑陰 御製韻

緬我 高宗肇御宇植碑泐詩表茲所靈木神聲溢畿

輔異蹟遐傳遍田父溯昔從母祀外祖

外祖祥公墓在黃木廠迤東幼

曾從母經此

曾登斯亭撫楹柱公輪過門懷空妬重檐深嚴

絕風雨今重經此年幾許頽然臥地失堂廡雕榱繪桷

紛襲取荒庭蕭條神難處

舊有亭九楹覆木今餘半堵耳

人難恆今物

易古吁人間事皆阿堵哀哉我母難再覩紀歲轉胸三

經鼠

賢庚子生七歲失恃今三十四矣始再掃墓得經此

驅車重來荒塋下墓門

有棘斯孰斧

外祖無嗣

嗟嗟世路饒岨嶢人亡木存木猶愈

熒熒孰哀吾與汝

同行文仲恭亦早失恃嗣爲叔子

靈光寺

憶昔從老父再家斯山陲讀書靈光寺到處恣遊嬉

戊申

移家西山庚戌去甲寅再來丙辰去

一別忽十載城市同奔馳靈境復獨

至撫事心傷悲

移居後數從遊自庚申後未至

豈惟人事殊林泉亦改

移覽景念前情不覺涕漣漣怕聽暮鐘聲恍惚歸家時

讀書時每鐘鳴歸家侍晚飯

七尺塊然在虛生將何爲哀哉復哀哉

人生胡有知

靈光寺題壁用法華上人韻

十年奔走困塵寰  
飢逼寒驅日不閒  
風景未殊人事變  
傷心怕看舊青山

偕王芷亭道士志伯時遊昆明湖

列坐高亭上  
悲秋獨斷魂  
水枯斜照暗  
風急亂雲翻  
事變山猶峙  
家亡我尙存  
迴頭十年夢  
愁緒不堪論

又

傷心國亂家亡後  
今日重來舊水涯  
十載湖山悲故主

一門生死泣孤兒  
瓊林玉樹輝  
鶯殿錦纜牙樯耀鳳池  
四海治安多樂事  
不堪迴首太平時

昆明湖登高

湖光黯澹嶺嵐消  
蘆雪飄風草木凋  
十一年來人似舊  
登高重上繡漪橋

田盤集

王申

訪竹舫不遇其弟松舫  
留宿書此贈之留呈竹舫  
漁陽有二妙盤山王竹舫  
盤山喜已見竹舫竟空訪詩  
人何日歸好景誰酬唱  
迴首望雲峰獨立增惆悵

難兄有難弟高致追瞻由感君憐才心爲君一夕留濁  
醪開心懷暢叙情綢繆山中桃花開相約同登遊

贈張子真

田盤多奇峯居人不敢俗張子饒幽情精舍依山築我  
來遊田盤三日宿書屋談笑恣歡娛登眺快瞻矚朝出  
供杖履暮歸具梁肉遊山每得句燈前必代錄感子情  
誼高纏綿結衷曲何時掛冠歸結鄰伴幽獨

東遊集

王中

搖動石

千像寺後石如屋一人推可  
動萬人推則不動亦一奇也



一指力何微能搖萬鈎重歎息天下物無靜不可動

仙人石

天香寺後石上有二影白跡呼爲仙人影

石邊留古影果否屬仙人世事盡虛幻何須影獨真

先師臺

天香寺後山上傳爲黃龍師薰修處下有東五臺字

先師杳何處山半留高臺亂石不知徑白雲時自來

東征石井

先師臺下相傳唐太宗東征命開井三丈始有水井通體塊石

鑿石至三丈辛苦始得水爭如坐咸陽醴泉自甘旨

養疴集

王申

見新月作

自九月臥病兩見新月矣

麗譙風順報初更臥病空齋寐不成一片淒涼新月影  
今宵又向小窓明

冬日詠懷

心緒似懸旌窓前鷄亂鳴牢騷不成寐倏忽已殘更病  
久疎人事愁深澹宦情擁衾頻反側鄰寺送鐘聲

鎮日支頤臥悲來時自歌雪晴檐溜急風靜鳥聲多舊  
事醒如夢新愁湧似波莫言年尚壯鬢髮漸婆娑

壯志隨年減窮愁逐日稠尙難謀一飯安敢望千秋事  
業留詩卷生涯付酒甌光陰真迅速又見月如鉤

位賤誰相助家貧孰肯親自知難合俗翻幸不如人起  
落卅年事浮沈七尺身此生原命薄屈抑敢求伸

不寐偶成寄文仲恭

虛牖風聲厲蕭齋冷不勝曉寒輕破被曙色暗殘燈鬱  
鬱心將碎悠悠齒又增飢寒兩難却迂拙愧無能

低首棲蓬巷悲哉病復貧故交皆冷落新歲更艱辛不  
肖皆因我無情敢怨人年華枉拋却指日又逢春

斗室無人伴侵肌朔氣涼鴉聲收月影鷄唱促晨光宿  
火猶存鼎浮塵口滿牀裁詩強排遣愁緒總難忘

落拓人同棄迂疎自覺羞不能圖富貴安敢責交遊壯  
志貧難立豪情壯已休微官空束縛溫飽乏良謀

望洋集

上李官保

鵷章

聖朝景運開中興我 皇登位天下平天眷元首生股  
肱生我夫子扶 皇清少攀仙杏躋蓬瀛鴻文傳誦驚  
公卿服官中外赫有聲吏民到處欽忠貞文事武備罔  
弗精將出相太未猷宏奇勛卓建驚雷轟憶昔殺運開  
南溟赤眉跳梁蟠金陵吳吳昏暗妖氛騰髑髏塞江波

溽腥鬼多人寡眾橫營勞師十載寇益增弗星一臨民  
重生長驅直擣鋒莫撓指揮轉胸收吳城赤手破浪擒  
鯢鯨毒蛟巨蜃同歡迎殺氣衝空日避明軍聲撼地雷  
羞鳴三江五湖同時澄彤旗奏捷飛 帝庭 聖恩錫

爵標顯榮中州山左餘孽盈摧枯拉朽軍弗停秦關悍  
黨稽 天刑挺而走險超渭涇燕南趙北行縱橫烽煙  
飛騰延 神京禁兵十萬莫能懲勤王師至寇立驚元  
帥用水如用兵乞師河泊神効靈波刃浪劍飛空行聚  
而殲旃消芽萌高攀銀漢澆櫓槍洗滌日月驅風霆青

天欲墜隻手擎天狼走避彗隱形蠻燈蔡雪安足稱昔  
有李郭今李曾膚功再奏誰敢爭 王三錫命殊恩膺  
嗟予小臣庸無能壯志莫展空怵怵敢云衣鉢希和凝  
勉爲忠直遵典型長歌敬獻伸下情願公終始保令名  
津門旅舍臥病題壁

倦臥空房旅恨賒馬嘶人語厭喧嘩沈疴委頓將誰告  
壯志摧殘枉自嗟貧已難堪偏遇病生猶未保敢思家  
窮愁俱迫無方遣迴首雲山萬疊遮

旅舍題壁

百鍊鋼成繞指柔  
風塵落拓且低頭  
奔馳道路誰相問  
拂拭鬚眉自覺羞  
名士也須工世態  
寒儒安敢說離愁  
傾身營飽原非計  
何況艱難不易謀

偶成

病骨崢嶸意興闌  
征衫深怯海風寒  
別離未久思彌甚  
離縱非遙見亦難  
詩句背人題瑣屑  
家書強自寫平安  
紅樓迴首無由見  
滿地花叢不忍看

潞河逆旅題壁

暗風穿牖落燈花  
旅邸蕭條恨倍賒  
滿腹牢愁誰可語

悲涼非只爲離家

偶成

不死惟當醉無能敢怨窮飢寒欺拙大家室損英雄酒  
淚乾坤大回頭今古空浮生何足說身世本匆匆  
往事都如夢蹉跎誤此身落花縈舊恨流水悟前因愁  
重翻成達情癡自忘貧幽懷誰可憇辜負畫樓春

零星集

送大妹之木蘭

我父兄弟三兩叔皆無子在男惟有我在女惟有爾妹  
爲



五叔輯五公所生五叔生弟寶錫十叔生妹適尙無出

兄寶書俱早死廷同生兄弟姊妹亦無存

我子俱稚齒妹適隆曉村秀才現需次木蘭少與廷同

壽富八歲次

長四兩房中骨肉僅存此爾家既不豐我

更貧如洗同守京華中飢飭困鹽米我雖登科第虛名

不足美爾家官更微詔精亦無幾今爾當北行我心悲

難已手足無一人孤立將曷恃我性素乖謬言動招謗

毀室家判冰炭婚媾爭火水牢愁損心志勞瘁困飢餓

爾歸雖匪遙恐我難爾待叔墓無虞荒有我熱錢紙阿

二幸長成俾還奉叔祀

家君本四房出嗣長房現擬以富壽還嗣弟寶錫奉四房祀

努力事所天家政善協理幸且勿念家強飯保遺體關  
山雖險阻相去路亦邇今生或重逢開懷莫泣涕

賀文鏡寰補領催

不能登科名不能成宦仕五十始一兵區區何挂齒喜

君獲微餉藉可聚妻子事無分巨細得難斯足喜鏡寰少年

入泮垂老始補領催虛名無實利顯榮徒爲耳不見我竹坡翰林

貧欲死

湖上

尙有湖山在何論身世更孤峰餘萬壽淺水認昆明骨

肉悲難聚于茂喜暫平秋光正瀟灑隄畔且閒行

庚申夏侍

先君遊湖上經月後遂遭兵燹今十五年矣

重陽偕志白石宗子美子佑昆仲紫竹禪林登高

萬山奔走拱

神京千里幽燕秋氣清大野風霜催落

木亂峯雲霧擁層城傷心今古淚同墜放眼乾坤杯獨傾幸值良辰共登眺暫拋愁緒遣閒情

題朱小舟愛蓮圖小照卽送之甯鄉任

洗淨劍頭血臨流自觀覽願君守此心如蓮永不染

小舟

曾從軍山左現出宰山右甯鄉

終

偶齋詩草內次集卷四

使越集

癸酉

宗室寶廷竹坡著

良鄉旅舍題壁

輶車結伴出燕京  
回首陽關第一程  
山帶暮雲隨驛路  
塔銜殘照壓孤城  
新詩題壁添離思  
濁酒傾杯觸旅情  
今夕還家應有夢  
不堪獨聽曉鷄鳴

涿野行

蚩尤死涿野  
萬年血未乾  
化爲遍地水  
濁浪連趙燕  
泛濫卽數郡  
爲患悲連年  
沃野變澤國  
陸路帆檣聯  
哀哉

此編氓蕩析居難安良苗千萬頃轉眴隨狂瀾痛哭呼  
神龍爲我開海門收回九河水涵出千里田

良鄉旅舍口占

旅館宵深靜不譁涼風蕭瑟透窓紗遙知兒女隨娘臥  
同向燈前說阿爺

昨宵

昨宵惜別離相對不忍睡今宵強欲眠倦極難成寐今  
昨曾幾時情境歎迥異倚枕數更籌孤燈花自墜

景州旅舍題壁

景州仍直境德州屬山左

新月穿櫺照榻涼殘燈無焰冷空房擁衾且莫生悲感  
今夜依然是故鄉

禹城縣

禹蹟久湮沒千秋縣尙名河枯留故道野曠賸荒城大  
聖不再作小民何以生洪濤遍燕趙漂泊慨羣氓

杜家廟旅舍題壁

山如天壽千重碧水比桑乾一色黃回首燕雲九百里  
緣河山水似家鄉

羊流店

峴山墜淚古今悲故里荒涼尙有祠歎息羊公身去後  
人閒到處立豐碑

寄內

莫念征人苦家門賴主持殷勤稱健婦子細撫嬌兒驛  
路誰憐遠歸期勿怨遲窓前小楊柳爲我護柔枝

淮陰夜泊

南風吹水響泠泠城倚淮陰客棹停兩岸帆檣排皓月  
半河燈火亂疎星道途險阻誰相惜風浪奔馳我乍經  
借問釣臺何處是夜深無地弔英靈

朱買臣墓

古墓荒涼草似茵  
回頭往事倍傷神  
炎涼故態原如此  
豈獨區區一婦人

癸乙襍鈔集

上

浙江試院偶成

癸

我昔赴試時每怨主司昏  
今我爲主司憤憤猶夫人  
寄語天下賢主司今日當思赴試時

飲酒

乙

荆卿飲燕市酒中有大志  
我乏荆卿才見酒聊復醉  
豈



無高漸離卑伏難吐氣隱憂在眼底沈酣強快意迴首  
望東溟颶風挾雨至

歸隱苦無山勉強爲小官官卑人不喜白眼橫相看去  
去不能去進退同艱難瓶中酒已空把盞頻長歎

功名天所授不能智力爭何爲自不惜終日勞經營經  
營竭以力思慮徒牽縈望切煩惱起謀深疑忌生顛倒  
枉自苦千慮難六成縱使倖捷獲命定非人能我生甘  
迂拙魯鈍無聰明但願得美酒沈醉常不醒

客來賒酒飲歡呼不知暮醉後不能送酣臥任客去酒

醒人盡散明月上高樹

正月九日與鏡寰飲酒醉後書示芷亭

開年始一見一見卽飲酒竹交親厭別離情真無可否

鏡一醉死可忘憂愁復何有竹縱或同父母恐不如良

友鏡少壯亦可悲何況君老醜竹興來發狂言空茲石

與斗鏡詩成示道士垂涎枉張口竹芷亭時齋戒不飲

壽顧香畹先生七十

天地有大德覆載生黎蒸綿綿億萬年元化無時停人  
秉天地氣天心當順承民命重官箴尙德勿尙刑卓哉

香畹公久標循吏名治獄多平反惟公斯生明積德自  
獲報黃耆天錫齡仁者必能壽生人卽自生

涿州道中見西山口占

癸

南北三千里馳驅久未還車中開倦眼忽見故鄉山名  
利幾人得身心何日閒峯巒能傲我依舊碧孱顏

除夕阜成旅舍題壁

癸

燒空爆竹競迎春轉眼明朝歲又新料得隔牆茅店裏  
燈前應有憶家人

杜家廟旅舍題壁

癸

日日望家家不見眼前只恨有山遮今朝已出青山外  
底事依然不見家

京華風景近新春今夕家家祀竈神遙憶嬌兒不解事  
分餚燈下笑言頻

元旦富莊驛旅舍題壁

甲

凌晨早起動征輶歸思匆忙忘歲朝久客倍驚時序速  
近鄉轉覺路途遙

離京不過數百里  
年前竟未能歸

村多鼓樂民安樂

路少行人野寂寥四望塵清雲散盡一輪春日上青霄

癸乙襍鈔集

下

雲棲寺偶題

癸

天地生萬物人何忍殺之微物豈足重一物一天機展  
楮書數言用質蓮池師

寺爲蓮池大師建師有放生文

泰山五大夫松

癸

本是山中物原無簪組志強被大夫名何曾戀名位讓  
彼桃李花爭春同豔麗

登日觀峯看日落題壁

癸

我登日觀峯回頭看落日大道本虛空初落理原一

題曹季襄

咸熙

松風堂讀書圖

圖繪季襄幼從其  
太翁讀書堂中

松風滿紙動寒翠披圖如見當年事却憶兒時在西山  
隨父讀書靈光寺

賀錫蘭臺芳登科乙

我父昔居山與師共結鄰爾我同讀書相契如弟兄少  
小不知愁嬉戲忘賤貧長大各分散落拓埋風塵甲寅移家

西山馮雲浦夫子亦移居山中遂受業焉延年十五蘭臺年十四堂上人俱老凍餒虧

晨昏功名不遂願舌耕悲苦辛卅歲我幸第慨爾猶沈

淪

戊辰廷捷南宮年廿九

青衿縛不解老大嗟寒酸今年爾得捷

聞之喜欲顛喜極感慨生舊事傷心神我雖得升斗養

親止一年爾親雖在堂萱茂摧靈椿我師老名士才學

超羣倫白頭困場屋抱志終未伸

雲浦夫子博學多才詩詞駢文外奇門六

壬諸術皆精全集數十卷

子弟

同門文松岩秀早舉孝廉

皆登科衣鉢徵清真九

泉隔萬里捷音聞弗聞人生當早貴早貴能養親羨爾  
尙有母努力躋青雲

述志

乙

倖免危亡慘偷安淚莫傾無能休避禍不死忍謀生彈  
指華年過回頭舊事更功勛傳祖德詩禮溯家聲宦  
海難尋岸文場枉著名憂深忘覓樂辱重恥求榮天地

心何在身家念久輕壺中有村酒沈醉臥前楹

偶成

癸

翹首天涯遠空勞喚奈何家山千里隔節序半年過歸路夢中近鄉愁枕上多扁舟行已緩連日又風波

皆平新構齋成顏曰折栢因居乃顯靈宮故地宮  
舊有折栢故取以名齋與圍索同人題詠書此  
應之

乙

琳宮有古栢枝折樹猶生折栢今已無因齋存其名大道本虛無在神不在形窓前有海棠枝葉同青青



鼠虎集

丙子至戊寅

口占送伯石

遠別五千里故交十六年躊躇兩無語相對坐燈前

悼亡

丁

娘亡留兩兒兒啼耶亦悲牽衣問阿耶阿娘來何時

收新疆

戊

舊境一朝復飛章達

紫宸共傳除積寇竟使入強鄰

射匱沈淪久

射匱可汗庭  
卽今伊犁

于闐掃蕩新鯨鯢聞尙在珍

重念元臣

香界寺娑羅樹歌 戊

香界寺中有古樹枝葉扶疎子依附山僧告客稱娑羅  
久植禪林神呵護傳聞此樹生西方如來說法曾乘涼  
曇雲法雨久滋潤根盤節錯堅且剛何年移自衆香國  
異植新奇人罕識昂然獨立空山中萬木青蔥同改色  
當時一駐蹕平坡山香界寺山名平坡此木叨幸瞻 天顏盛  
衰轉首若流水 宸遊不到垂百年自從庚申颶風起  
三山樹木同時燬幸留碩果歸然存混處叢林免樵采  
瓊樓玉宇魑魅栖安得 翠華重泣止噫安得 翠華

重泣止不如斧斤早殘毀

夏日同文仲恭宿靈光寺感賦

戊

仲恭招我遊西山靈光古刹同盤桓山僧留人苦不放  
一住三日渾忘還是時正值節潯暑林壑清涼不知苦  
況是山深少晴霽日日南風吹暮雨名區□□有興廢  
風景無殊時無異溪花開落泉自流巖雲聚散山常翠  
憶昔庚申六月中隨父避暑來梵宮君家嚴君適亦至  
賦詩飲酒歡相從舊遊迴首十八載生離死別嗟匆匆  
山靈見人應感慟老幼兩世踪跡同人世變遷本無定

繁華轉眼皆成空君不見玉泉萬壽舊宮殿至今摧毀  
如蒿蓬

年蟲行 戊

甘霖海降郊野融勃然起矣良苗芄衆魚旒旒幸有兆  
旱灾甫弭胡爲蟲螟螣蝻賊舉此類名之以年豐變凶  
俗呼黏蟲謂其黏滯又呼綿蟲謂其綿弱厥軀深青厥首赤不飛不躍殊蝗

蝻入心食心葉食葉肆噬嘉穀充殮饗春畊夏耘殫心  
力百畝一過俄頃空小民畏蟲甚畏賊泣伏猷猷祈神  
功去年南方苦蝗害羣飛聚食延江東北方今復罹此

害灾殃絡繹悲三農我思奸臣害政蟲害稼殃民厥罪  
將毋同稼害僅使一方餓政害天下同困窮其禍較蟲  
更酷烈辨之當早難姑容嗚呼辨之當早難姑容

秋雨歎用杜工部第一首韻

戊

槐花淋盡哀蟬死溼苔上樹陰菌鮮閉門坐守不能出  
破甑米罄囊無錢西風吹雨晚逾急老屋壁空剩柱立  
孤燈閃閃光不明窓下稚子相對泣

靈光寺山亭納涼題壁

戊

小亭永晝足盤桓雲樹陰森六月寒溪淺荷花開有鱗

洞危簾蔓繫巖端家貧轉羨爲僧好官冷方知報國  
難欲向主人借廬住相將常把釣魚竿

同文仲恭遊靈光寺感舊兼懷小癡上人用韓昌

黎山石韻

戊

良儔召我躋翠微

靈光寺山名翠微

出關西眺遊興飛西山雨

渥草木長雲嵐滃鬱峯巒肥驅車卅里抵古寺老僧不

見徒侶稀舊山再到足感觸禪房靜憩忘飢飢虎峯喜

見故人至

寺西有虎頭山

獨立不去當窓扉亭臺依舊半殘破

山池水淺荷香霏廿年往事一轉首人生白髮松長圍

嗟嗟主人杳何在風塵昏暗汗緇衣山林囹圄接咫尺  
禪心解脫名心轡七旬年華萬里路垂老遠別何時歸  
夔倫堂偶成 丙

正衿相對坐華堂滿院槐花士子忙樹影濃添池水碧  
蟬聲清入午風涼觀光共喜秋闈近獻藝偏宜夏日長  
傳語諸生須自勵休云報國有文章

詠蘇盤興王公玉文仲恭聯句 戊

市脯大嚼懷胥門不詡珍錫聊盤殮 仲 夫差遺味千載  
存膾殘爽口噉五辛 竹 龍哭鳳泣煎髓肝饕餮七箸恣

貪吞

公

七襄羅列襍組陳丹赭黃蠟白爛銀

仲

西江高

捧明月輪白玉皎皎當筵圓

竹

吳儂鑄鑄器日新割烹

不數商有莘

仲

東坡肉腴安足云西子垂涎舌莫捫

竹

笑爾苜蓿空朝昏氣奪蔬筍饒厭葷

公

頻年大禡人飯

人血肉塞口牙齒殷

竹

木皮剝盡無草根餒而嘯招灾

黎魂

公

廟堂肉食何紛紜權微志巨難副民

仲

且安寒

峻享館餐授食昕夕煩王孫

公

春旱甫弭秋霖綿醉飽

深愧予小臣

竹

荒唐詞用韓昌黎山石韻

戊



三山石重鰲力微弱鳥一鳴沖天飛素娥青女自知嫫  
豈與楊趙爭瘦肥眼中之人天上幾殘蟾未落晨星稀  
蟠桃實小不滿口侏儒死飽朔死飢琅玕足腹叫閭闔  
鴻龍玉狗關雲扉上界炎涼下界異驕陽冬曝霜夏霏  
神荼鬱壘倚樹息魍魎弄水篩九圍昇天雞犬但飲啖  
羣仙酣醉汗霓衣天駟繫廐不驅策伏櫪咀草牢受轡  
碩膚神人何日醒天柱朽折將安歸

同增韻清樂善園聯句

戊

商飈導人來西郊遠山昂首如相招

清

高粱北迥橫古

橋高梁橋在西直門北開伸水縮浪不驕竹荒園牆頽狐兔跪老

松鱗裂石齒戕清殘花紅死蓮葉焦菰蒲上岸牽蓬蒿

竹韓憑潛遊齊女號病樹陰癰荒草高清三山煅煉昆

湖熬樓臺宮院隨煙消翠華影斷鸞聲遙野人營卒

相遊遨茲園久廢翻幸微荒僻獲免兵燹燒竹

題畫石便面戊

冥然一卷形磊砢雨淋日炙堅不改鍊之可以上補天  
銜之可以下填海棄擲荆山人不知卞和抱足空泣涕  
請君持歸試一剖方知其中有玉在

落星石

在天則爲星墮地則作石星高同仰瞻石舉同棄擲豈  
伊質本殊貴賤因地易寄言諸經緯高明自珍惜

靈光寺月夜聽吳少嫺彈琴

戊

幽人宵不寐取琴松下彈一彈復再鼓知音相得難涼  
風穿樹來月上東山端

戊卯集

戊寅巳卯

寄夏滌菴

字伯定  
戊

吁嗟乎夏伯定乃天下至迂至拙至狂至妄人古人尙

罕覲求之近今疇其倫天生此材必有用惜哉質美無  
陶甄吁嗟乎伯定一身俱是骨泰華壓首項不折吁嗟  
乎伯定滿腔俱是血洒遍四海水皆熱上下五千年縱  
橫十萬里眼中惟有李忠定忠定一去難再來獨學無  
友難成材吁嗟乎天生夏伯定何爲哉

題日本竹添光鴻棧雲峽雨日記詩集

別

光鴻字漸卿氏竹添又稱進一其國熊本人也官  
大藏省少書記性好遊工詩因事使中國事畢遍  
遊蘇杭復北入京慕蜀山水勝欲遊焉慮爲人識

作蒙古僧裝往至潼關始改舊裝遂入棧之成都  
緣江下三峽久之始歸得詩一卷日記二卷今歲  
復至京仲秋來訪予遺日記并詩集予方遊山未  
歸次日復來使閹人辭焉返其所遺光鴻晚其駐  
京使臣田邊太一致書摠理各國事務衙門代上  
聞移文詹事府遺書求見仍以前所遺者遺焉  
季秋旣望來見與語弗盡解筆談久之始去求題  
其日記詩集并詩贈別蓋將東歸也其人有詩癖  
今體頗佳古體音節未盡諧因其國讀書襍以土

語字不盡讀本音有一字讀三二音者今體有平  
仄尙可摹古體則無所範圍也自知其非求教甚  
殷予感其意且念其生雖外國而同儒教爲題七  
言古一篇光鴻別號井井居士是年卅九

居士家住扶桑東幼攀若木窺六龍驪珠偷得光照胸  
新詩傳遍靈芝宮熊本扁小名難容破浪有志乘長風

中華自古生聖人儒風遐被延橫濱

日本地

其人雖異其

教親噬肯來遊徵同文要觀形勝周廣輪龍洞虎林厭  
攀援僧裝西上過潼關病中高攀三峯連

經華山因疾未登洗

頭難窺玉女盆華清泉洒東海塵手摩金牛登劍門舉  
觴渴挹岷山源高唐題詩招楚魂狂歌過退巫陽雲順  
流東下尋春申掉頭入海一旦還雙眸帶歸秦蜀山吾  
聞日本國海外郡邑淩虛凝蜃氣島城海池下無地魚  
紅鰲黑人爲食晁監一死才疇繼挺生奇人靈秀萃我  
生好詩兼好遊模山範水輕險幽讀君詩更遊興適滌  
筆思赴萬里流醉來磨墨蓬山頭天吳蜺像相唱酬踏  
遍三島窮十洲

香界寺

卯

歷與不到幾經春  
亂草離離滿路塵  
聞說此閒炎熱少  
年來避暑又何人

送朱竹石之榛之江南

卯

朱君有家學

竹石爲爲聊先生從孫

滿腹積球琳作吏能強項治

民必盡心江湖秋水濶風雨海雲深  
遙指孤帆去蒼茫何處尋

偶成

卯

西風吹疎雨颯然生  
晚涼亂草垂檐端  
參差根已黃閒愁百無賴  
南窓聊舉觴  
獨飲不成歡  
撫時增感傷  
稚子



拾餘肴淋漓脂染裳一笑姑爲樂嬉戲愁暫忘空庭無人聲堦下啼寒蜚

壽汪霞山

汪正元少霞之父少霞官刑部

少霞誠君子治獄多平反豈惟性仁厚忠恕原家傳玉衡迴孟陬介壽開春筵徵詩作萊舞禱祝叢新篇仁者必得壽惟德能動天

送徐季和

致祥按試永平

卯

右擁太行左滄海口口口口神京在東西朔南數萬里九州風化此爲始順天學使重罕比十府六州景模

楷八旗翩翩佳子弟披金琢璧拔精美當年同舟使越

水

癸酉季和爲浙江正考官予副之

襄理衡鑒隨尺咫湖山舊遊如夢

裏光陰轉首六經載送君東行我心喜畿輔文風當日  
起

偶齋菊花盛開皆平夕來留與小飲聯句

卯

秋光已老菊尙開風霜寒不到偶齋

皆

寒花冷官兩相

得草木有骨真吾儕

竹

人生所喜是寥落形如槁木心

如灰

皆

石炭價高不得買煙火銷盡無塵埃

竹

幸有酒

肉煖吾腹豈計明日飢寒催

皆

三閭不作彭澤死棄置

不食空殘摧

竹

人生有幾須行樂豈計此身才不才

皆

古今變局在今日內外一家通塹垓

竹

冠冕草莽同此

志臥看風月歌臺棨

皆

養疴後集

庚辰

病中登寶珠洞與子美聯句

前歲病足我來此

戊寅夏與陳伯潛陳緘齋黃再同登此予患足

今歲病股君

復來

竹

我存餘勇尙可賈登高一笑心顏開

子

況我亦

復病新愈神悅勞忘何壯哉

竹

病

海雲垂地日脚散

天腰青嶺橫週圍

子

風吹雲影滿地走破碎萬片光合

離竹淺深綠遠難測桑乾一綫流無涯子長空千里

接溟渤煙氛蒼莽心目迷竹憑臨絕頂覺天近下視崕

嶠如孫兒子昆明一區積盆水摧殘亂石堆蓬萊廿年

舊事觸心起水戰在眼無旌旗竹寶珠光老無遠照白

晝往往來魑魍地幽赤日嬾復到年深畫棟埋煙煤子

却憶當時駐遊蹕宸章印石山生輝洞外石刻乾隆御製詩

太平巡幸四州靜傷心自恨生何遲竹萬幾多事

旋棄置恩許遊客閒留題日斜夕子且歸去枯腸思

酒臣朔飢子

登寶珠洞與子美聯句用韓昌黎謁衡嶽廟韻

晴郊興至驅山公日斜深入山之中子醉來扶病上絕

頂萬峯俯首難爭雄竹聖德儉樸棄別館披衿不復

來王風子九夷八蠻一山聚教澤遠被埏垓通竹異端

到此或心服每歲皈依空王空子是時正值入伏始冰

天雪海同消融竹聖德望晴天亦許鸞書昨下蛟龍

宮子豐隆列缺盡休沐水雲燒出明霞紅竹吾儕但知

山水樂豈憶宵旰勞子宸衷子微疴擾我怠朝謁煙霞

痼疾漸蹉躬竹炎天冒暑矜怪僻如此逸興誰能同子

安讓無愧素食行將挂冠於此終竹妻孥飽煖盡

帝力奈何俗子貪天功子飢來携手下山寺明蟾觸破

雲朦朧竹舉杯待飲久不至酒壚更在東村東子

夏日與古階平飲酒聯句仍用前韻

丙寅之秋初識公廿年一瞥風塵中階相對髣髴毛各二

色酒酣耳熱心猶雄仲一杯濁醪洗磊塊猖狂久已忘

途窮階四海故交生有幾迢迢朔雪連炎風仲年階平

來訪舊半黃土惟君路與蓬萊通階宦途坎壈甚山野

功名富貴迴頭空仲惟有醉鄉足千古我今何幸遇孔

融階憶昔金臺決文戰郭隗故跡尋燕宮仲迄今荒臺

太寥落夕陽仍傍天壇紅階舊詩迴憶猶上口契濶

誰復知苦衷仲彼此相期互努力各以道義持其躬階

舉杯四望宇宙大新開三界非古同仲海外風波正多

故可容棄繻蹤希終階然犀欲照四洲水澄清九有非

奇功仲高談雄辨各已醉手持竹管眸朦朧階掃愁有

帚莫辭遠崑崙西下滄溟東仲

題許紹魯嗣先人殉難事略後

瘴雲一起西粵荆吳萬里漂戰血浮尸橫流江水溢

臺城月夜石頭裂偉哉許氏真忠烈毀家募士賊同殺  
水溺不死重火熱尺帛旋首醜醉舌黃髮童顏命胥絕  
招空有魂葬無骨卅人殉死三人活天不殲許哀忠節